

BERITA HARIAN

25 JUN 2013

© SELASA 25 JUN 2013

BH

PENDIDIKAN

UPNM utama akademik, ilmu ketenteraan

Saya merujuk tulisan Pecinta Keilmuan dari Lembah Klang yang disiarkan BH, Khamis 20 Jun 2013 yang menyatakan tidak puas hati terhadap prosedur dan keputusan meletakkan seorang jeneral sebagai Naib Canselor Universiti Pertahanan Nasional Malaysia (UPNM).

Pecinta Keilmuan mungkin tidak mengetahui dan memahami latar belakang serta objektif penubuhan UPNM. Sebagai antara individu yang terabit dalam penubuhan UPNM, izinkan saya menerangkan latar belakang penubuhan universiti itu.

UPNM ganti ATMA

UPNM ditubuhkan atas usaha Perdana Menteri ketika beliau menerajui Kementerian Pertahanan. Ia ditubuhkan bagi menggantikan Akademi Tentera Malaysia (ATMA) yang pada masa itu bergantung kepada UTM bagi tenaga pengajar akademiknya.

Kadet ATMA selain daripada menjalani latihan tentera perlu mengikuti kursus akademik. Pada akhir pengajian mereka akan dianugerahkan ijazah oleh UTM berdasarkan kursus diikuti.

Selepas ATMA beroperasi selama 10 tahun Kementah mendapati silibus akademik UTM (yang menjurus kepada

keperluan awam) tidak dapat memenuhi sepenuhnya keperluan Kementah dari segi pendidikan akademik bagi bakal pegawai tentera. Oleh demikian, satu kertas kerja dikemukakan Kementah untuk membolehkan UPNM ditubuhkan.

Objektif penubuhan UPNM dinyatakan dengan jelas melalui Perintah Pemerbadanan dalam Warta Kerajaan bertarikh 9 November 2006. Bidang tujahan UPNM adalah dalam bidang pertahanan dan keselamatan.

Penubuhan UPNM dibincang dengan rapi di Parlimen. ATMA dibubarkan dan sebagai pengganti UPNM ditubuhkan pada November 2006. Selaras

dengan keperluan perundangan memerlukan semua universiti diletakkan di bawah Akta Universiti dan Kolej Universiti (AUKU), UPNM turut diletakkan di bawah seliaan Kementerian Pengajian Tinggi.

Naib Canselor dipilih Majlis Angkatan Tentera

Bagi menentukan objektif penubuhan sebagai institusi ketenteraan dan kepentingan Kementah sebagai pemegang taruh utama serta penentu hala tuju dijaga, keputusan Kabinet dicapai agar pemilihan Naib Canselor UPNM dibuat oleh Majlis Angkatan Tentera dengan perkenan Yang di-Perutusan Agung. Selaras dengan AUKU, surat pelantikan rasmi akan ditandatangani Menteri Pengajian Tinggi. Berdasarkan persetujuan dan peraturan inilah pelantikan Naib Canselor UPNM dibuat selama ini.

Sebagai universiti, UPNM tertakluk kepada peraturan dan keperluan bagi menentukan taraf akademiknya selaras dengan universiti lain. Program ijazah dan diploma yang ditawarkan perlu memenuhi piawaian Malaysian Qualification Agency (MQA) dan juga badan profesional yang berkaitan. Isu UPNM 'diperlekehkan' hanya akan timbul jika keperluan ini tidak dipenuhi.

Dari segi tenaga pengajar UPNM memerlukan tenaga pengajar tentera, bekas tentera dan awam yang mempunyai kelayakan profesional dan akademik yang relevan. Apa yang penting ialah mereka memahami hala tuju dan agenda universiti.

Kepemimpinan awam tak penuhi keperluan

Kepemimpinan awam di UPNM mungkin tidak akan dapat memenuhi keperluan yang dinyatakan di atas. Seorang ahli akademik 'yang terbukti ke-sarjanaan dalam kalangan profesor' seperti yang dinyatakan oleh Pecinta Keilmuan tanpa pengalaman ketenteraan tidak akan dapat memenuhi dan menghayati perkara ini.

Pihak UPNM mengambil ahli akademik yang tulen, ikhlas dan memahami objektif dan agenda universiti dan pertahanan negara untuk menyertainya. Dalam hal ini, wajar bagi kita semua menghayati perkara ini dan sama-sama menyokong dan berusaha menjadikan UPNM sebagai *boutique university* dan ulung dalam bidang pertahanan dan keselamatan.

Lt Kol Ahmad Ghazali Abu Hassan (Bersara)
Jabatan Pengajian Strategi
UPNM

FORUM

Pembaca yang ingin menyuarakan pandangan berhubung isu semasa boleh menghantar sumbangan menerusi e-mel: bhforum@mediaprima.com.my